

Suspendiran načelnik općine Alagić

Danas je Visoki predstavnik, Carlos Westendorp, suspendirao sa dužnosti Mehmeda Alagića, načelnika općine Sanski Most, zbog nepružanja podrške implemetaciji Daytonskog sporazuma, nepoštivanja Pravila puta, te nepromoviranja vladavine zakona u Bosni i Hercegovini.

Ova suspenzija je uslijedila nakon stalnog apeliranja na gospodina Alagića da da ostavku ili suspendira svoje funkcije do okončanja istraga u vezi sa njegovom navodnom zloupotrebom javne funkcije. U vrijeme kada je Bosna i Hercegovina kandidat za prijem u Vijeće Evrope, od najvećeg je značaja da se izabrani predstavnici u zemlji pridržavaju evropskih pravnih normi i prakse. Prema tim normama, zvaničnici protiv kojih se vodi istraga u vezi sa zloupotrebom javne funkcije i/ili javnih sredstava daju ostavku ili suspendiraju svoje funkcije sve dotle dok se u potpunosti ne istraže navodi protiv njih i dok se ne zaključi sudski proces.

Nadalje, Visoki predstavnik je uznemiren zbog činjenice da je gospodin Alagić pokušao da se pozove na imunitet uprkos vrlo jasnoj odluci Vrhovnog suda Federacije prema kojoj on nema pravo na imunitet.

Visoki predstavnik takođe konstatira da je gospodin Alagić bio jedan od urednika knjige o događajima u Sanskom Mostu tokom rata, koja sadrži spisak 292 navodnih ratnih zločinaca. Ovu knjigu je objavila Općina Sanski Most i ona je u upotrebi u školama na tom području. Prema takozvanim Pravilima puta, usvojenim u Rimu 18. februara 1996. godine u okviru Rimskog sporazuma, Međunarodni sud za ratne zločine počinjene na prostoru bivše Jugoslavije (ICTY) je jedini ovlašten da utvrđuje ko *“može biti uhapšen i/ili pritvoren zbog ozbiljnih kršenja međunarodnog humanitarnog prava.”* U pismu koje su OHR

i OSCE uputili Predsjedništvu 24. oktobra 1997. godine razjašnjeno je da se *"mora izdati instrukcija svim policijskim, sudskim i drugim relevantnim zvaničnicima da ne: 1) stavljaju u opticaj, distribuiraju niti se pozivaju na liste osumnjičenih za ratne zločine, osim na listu osoba koje je optužio ICTY i listu slučajeva u kojima je ICTY ustanovio da postoje dovoljni dokazi prema Pravilima puta."* Predsjedništvo je nakon ovog ovu instrukciju dostavilo relevantnim organima vlasti.

Visoki predstavnik je takođe poništio Alagićevo prethodno imenovanje za privremenu zamjenu na funkciji načelnika općine, te ovlastio Općinsko vijeće da imenuje privremenog načelnika općine Sanski Most.

Visoki predstavnik poziva građane Sanskog Mosta da podrže vladavinu zakona i brzo i razborito rješavanje podnesenih krivičnih prijava protiv gospodina Alagića.